

佛說觀無量壽佛經會意

顯明大師法集

代五十四第觀教台天持傳



相法師大法念明顯

自序

國運、教運注定我的命運，生來孤苦，與佛有緣。十二歲出家，就讀哈爾濱極樂寺佛學養成所，民國二十年，時年十五歲，於營口楞嚴寺，禪定老和尚座下受具足戒。遂至寧波觀宗講寺親近寶靜法師，於觀宗寺弘法研究社畢業後，擔任輔講、主講。並於香港弘法精舍輔講任內，蒙寶公傳授天臺宗正法，為傳持天臺教觀第四十五代。余受觀宗法乳，得佛隴真傳，生平以教觀總持，說默蓄於二六時中。至於稍盡棉力，護國衛教等事，樂觀長老著『中國佛教近代史論集』——法侶評傳，稱『白山黑水一奇僧』，暨廣嚴法師撰，中國佛教會出版『高山仰止』，予以披露，當之有愧。

來到臺灣，先後於汐止慈航佛學院、中壢佛學院、南光女眾佛學院、三藏佛學院、東山佛學書院、法光寺佛學研習會、中華佛學院、菩提佛學院等教授佛學。現仍任臺北華嚴專宗學院、中國內學院、能仁佛學院、福嚴佛學院教席，暨妙清佛學院導師、主講。其間所講課業及在各大專院校佛學社部分講錄及開示等，由學員筆記，彙編十一種，計教觀綱宗講記、天臺四教儀要釋、始終心要略釋、楞伽經要解、勝鬘經要解、四十二章經要解，心經、彌陀經、盂蘭盆經等講記，大乘起信論義疏、八識規矩頌講記等，商予付印流通，藉報四恩。非屬著作，豈圖傳聞，願求不違心、不違生、不違佛耳。

四明觀宗講寺臺北別院顯明念法識 民國六十八年三月二十日

佛說觀無量壽佛經會意

劉宋西域三藏法師曇良耶舍譯
四明觀宗講寺弘法沙門顯明講

一、五重玄義（妙玄通就七番共解五章——一、標章，令易憶持起念心。二、引證，據佛語起信心。三、生起，使不雜亂起定心。四、開合，五、料簡，六、觀心，起精進心。五心立，成五根，排五障，成五力乃至入三解脫。七、會異起慧心。）

第一、釋名：經字爲通名，餘七字爲別名，別相不出七種立題，謂單人（彌陀經等）、單法（大般涅槃經等）、單喻（梵網經等）、人法（文殊問般若經等）、法喻（妙法蓮華經等）、人喻（如來獅子吼經等）、人法喻（勝鬘獅子吼一乘大方便方廣經等）。

此經能說是釋迦，所說爲彌陀，雖有一觀字，能從於所，以人兼之，屬單人立題。智者疏云：『佛說卽教，觀卽是行，無量壽佛卽是理。』欲使行者，了經題，就說解教，起能觀行，見眞佛理。又云：『佛卽法身，觀卽般若，無量壽卽解脫。』意欲行者，知三德性徧一切處。故普賢觀云：『釋迦牟尼名毘盧遮那。』

佛者，覺也，一體三身，從因至果皆不思議，新譯金光明經云：『前際（理卽）如來不可思議，中際（名字——分證）如來種種莊嚴，後際（究竟）如來常無破壞。』本覺性具，涅槃云：『一切衆生卽是佛。』爲煩惱所覆名不覺。智者疏云：『念色身（勝劣應身及他受用報身）、念法門（報身）、念實相（所證名法身，能證名自受用報身）。』名始覺。知禮觀無量壽佛經融心解云：『修一心三觀求生淨土者，卽以三惑爲穢土之因，以三諦爲淨土之果，故別惑（無明）盡則寂光淨，究竟三諦也，此惑未盡則實報淨，分證三諦也，通惑（見思）盡則方便淨，相似三諦也，此惑存，則同居淨，觀行三諦也，非此諦觀安令四土皆淨。』捨穢必盡，顯淨無遺，名究竟

覺。

說者，悅所懷也，以四悉檀利益故革凡成聖則默然。

觀者，經文十六觀為能觀，其體皆一心圓三觀也。從假入空一相不存，空而不空，入假諸法皆立，由真俗二諦觀境，性離二邊入別中道，顯圓實相觀。若專方等未堪此觀，以別人初心雖信中道，不能即觀，要須析體觀空，故般舟見佛而論三力，謂佛威力、三昧力、行者本功德力。預取法華跨節而談圓三觀也。

無量壽者，梵語稱阿彌陀，智冥於理，始本兩忘，無身無壽亦無限量。隨他意隨俗說而論身壽量耳，應化隨緣現為壽命，有始有終，報身以智慧為壽命，有始無終，法身真如性為壽命，無始無終。所謂此土穢重十信方出苦輪，彼土境勝，九品悉皆不退。

經者，具云契經，梵語修多羅，佛說，簡非弟子諸仙諸天化人等所說，有歷法明經，訓法訓常之義。總之，一代時教被下之言皆名為經。釋名竟。

第二、顯體：釋論云，除諸法實相，餘皆魔事，此經以理融事，諸法實相為經正體，前以三觀釋名，今以四土顯體，於一念心顯四淨土，所謂一念隨喜皆趣念佛之海，盡歸靈覺之源。

第三、明宗：宗謂宗要，此經以修心妙觀能感淨土為宗，心淨佛土淨也。趣果必因，趣理須修，故云宗是二，體是一，顯體之宗，宗家之體，非一非異。

第四、論用：前明宗是自行因果，今論用乃化他能所，自行趣理故明妙觀，化他攝機合通眾善，此經以生善滅惡為用，能除五逆即生九品，所謂破戒、毀經、十惡五逆臨終十念亦得往生。無間轉為極樂，三障即三德五逆是寂光故。

第五、判教相：此經是大乘方等圓頓教攝。頻婆雖證小，但非此經正所被機，韋提聞已頓入分真（別地圓住），侍女聽之便階相似（別賢圓信），彼等是凡夫，未證小果，故知是頓，不從漸入，經在方等，非化儀之頓，乃

化法以圓爲頓也。

劉宋西域三藏法師曇良耶舍譯

劉宋——標代，姓劉，國號宋，南北朝時也，西域，約處，三藏，顯德，通經律、論，佛法誨衆名爲法師，曇良耶舍，此云時稱，譯者翻梵成華，在宋文帝元嘉元年於揚州所譯。

二、釋經文（從如是至清淨業處爲序分，爾時世尊放眉間光至諸天發無上道心爲正宗分，爾時阿難白佛當何名下爲流通分。

序分有證信發起，正宗有淨業妙觀，流通有王宮鷲山。）

如是我聞，一時，佛在王舍城，耆闍崛山中，與大比丘衆，千二百五十人俱，菩薩三萬二千，文殊師利法王子而爲上首。

本節文爲證信序，亦名通序，又名六種成就。

「如是」：智者疏云：『諸法實相古今不異名如，如理而說故爲是，決定可信故云如是。』法成就也。「我聞」：凡夫我爲諸見之本，二乘我空法有，菩薩二空，自在主宰永恒。云我聞者，表異外道，親承有在，亦是佛陀臨涅槃時所囑四事（惡性比丘默擯，以戒爲師，以四念處爲住，經首當安如是我聞，非獨我法如是，三世諸佛經初亦然。）之一，聞成就也。「一時」：機感合一之時、境智合一之時，西方此土天上人間時間不同，爲息諍故曰一時，爲時成就也。「佛」：新云薄伽梵，具六義，一、自在、二、熾盛、三、端嚴、四、名稱、五、吉祥、六、尊貴。大論以四義釋佛：一、能破煩惱、二、有功德、三、巧分別、四、好名聲。以多含故不翻。教主成就也。「在王舍城耆闍崛山中」：暫時曰在，久停名住，有天住（六欲天）、梵住（上二界）、聖住（三乘）、佛住（常寂光）佛住王城必攝欲色及三乘，並非專指身住。如智者疏云：『夫樂邦之與苦域，金寶之與泥沙，胎獄之望華地，棘林之比瓊樹，誠由心分垢淨，見兩土之升沈，開善惡觀二方之粗妙。』王舍城：天竺云羅閱祇伽羅，亦名摩揭提，此云不害，有犯死罪者

送置寒林。智者疏云：『釋論解，摩伽陀國王有夫人生子一頭兩面四臂，人謂不祥，王卽裂其身首棄之曠野，羅刹女鬼名閻羅，還合其身，以乳養之，後大成人，力能並國，王有天下，取諸國王萬八千人，置此五山，以大勢力治閻浮提，因此名王舍城。』耆闍崛山者翻靈鷲。山南有尸陀林，諸鷲食屍竟棲其山。處所成就也。「與大比丘衆」：與者共也，含六和僧衆之義。大者梵語摩訶，乃含三義謂大多勝。比丘翻除饑男，有因果六義，因名乞士怖魔破惡，果號應供殺賊無生。「千二百五十人俱」：三迦葉（優樓此云木瓜林，伽耶此云城，那提此云江。）兄弟有千弟子，舍利弗、目犍連共二百五十人，爲常隨衆，爲衆成就也。「菩薩三萬二千文殊師利法王子而為上首」：具云菩提薩埵，翻大道心，又翻覺有情，文殊翻妙德，又觀妙吉祥，以法化人人正法位，名法王子。智德獨尊故稱上首。是隨緣影響衆。下爲發起序，諸經不同，法華經放光，小品世尊以神力六種震動，報恩經如來微笑，金光明經入禪，遊於無量甚深法性。梵網經自唱位，我今盧舍那高座蓮臺。涅槃經勸人令最後問。楞嚴阿難誤墮。金剛洗足敷座。今經以殺父爲發起。

爾時王舍大城，有一太子，名阿闍世，隨順調達惡友之教，收執父王頻婆娑羅，幽閉置於七重室內，制諸羣臣，一不得往。

本節文爲發起序中，頻婆爲子幽禁。阿闍示生有怨，幽囚也，隨順惡教，幽緣也，重室制往，幽法也，收執閉置，幽業也。「阿闍世」：此云未生怨，或云折指，爲報往日頻婆行獵時所殺仙人之怨。「調達」：此云天熱或云天授，是白飯王子，阿難親兄，佛陀堂弟，有三十相，阿難無知授與通法，入山學得五通，語王子言我作新佛，汝作新王，共化世間。自造三逆：一、推山壓佛石傷足指，二、蓮花色尼呵之，拳打眼出，三、別講五法以誘五百新學，謂斷肉斷鹽不受五味不受割裁衣，不居聚落邊寺，破和合衆，教他二逆；教王殺父害母，生陷地獄。「頻婆娑羅」：此云拱實，亦曰影堅。

國太夫人名韋提希，恭敬大王，澡浴清淨，以酥蜜和麵，用塗其身，諸瓔珞中，盛蒲萄漿，密以上王，爾時大王食麵飲漿，求水漱口。

本節文為發起序中國太夫人密奉王食以濟王命。「韋提希」：此云思惟。調達闍世頻婆韋提皆是大權現逆現順利益眾生。若云殺無明父弑貪愛母，則功德無量矣。

漱口畢已，合掌恭敬，向耆闍崛山遙禮世尊而作是言，大目犍連，是吾親友，願興慈悲授我八戒，時目犍連如鷹隼（音隼）飛，疾至王所，日日如是，授王八戒，世尊亦遣尊者富樓那為王說法。

本節文為發起序中聖為說法以潤王心。「漱口」：表口業淨。「合掌」：表身業淨。「恭敬」：表意業淨。「遙禮」：佛有天眼通故。「大目犍連」：此云采菽氏，名拘律陀，無節樹也，禱此樹神而生。神通第一。「親友」：以友輔仁。「慈悲」：慈與法樂，悲拔怨苦。「八戒」：不殺、不盜、不淫、不妄語、不飲酒、不著華香、不觀伎樂、不坐高床（毘曇不著香衣、不上高床合為一）戒也。及不過中食齋也，名八關齋戒。「鷹飛疾至」：神足通也。「富樓那」：翻滿慈或滿願，說法第一，巧說善惡因果真實斷證之法，令王心開故偏遣之。

如是時間，經三七日，王食麵蜜，得聞法故，顏色和悅。

本節文為發起序中，明因食兼聞法多日不死。飯食資色身，法食資慧命，故和悅。上四節文明殺父，下文明闍王害母，仍為四節：一、為子幽閉，二、因禁請佛，三、佛與弟子因請往赴，四、見佛傷嘆請法。

時阿闍世問守門者，父王今者猶存在耶。時守門人白言大王，國太夫人身塗麵蜜，瓔珞盛漿，持用上王，沙門目連及富樓那從空

而來，爲王說法不可禁制。時阿闍世聞此語已，怒其母曰，我母是賊，與賊爲伴，沙門惡人，幻惑咒術，令此惡王多日不死，卽持利劍欲害其母。時有一臣名曰月光，聰明多智，及與耆婆爲王作禮白言大王，至聞毘陀論經說，刼初已來，有諸惡王，貪國位故，殺害其父一萬八千，未曾聞有無道害母，王今爲此殺逆之事，污刹利種，臣不忍聞，是旃陀羅，我等不宜復住於此，時二大臣說此語竟，以手按劍却行而退，時阿闍世王驚怖惶懼，告耆婆言，汝不爲我耶，耆婆白言大王，慎莫害母，王聞此語，懺悔求救，卽便捨劍止不害母，敕語內官，閉置深宮，不令復出。

本節文爲發起序中，闍王幽母。先探父事實，次門人實答。「不可禁制」：太后位尊，羅漢有通。「沙門」：華言勤息、勤修戒定慧，息滅貪瞋痴。「賊」：向彼異謀。「賊伴」：竊與飲食。「惡人」：違背我心。「月光」：智謀如月故。「耆婆」：此云能活，精醫道，是闍王庶兄，奈女所生。「毘陀論」：此云智論，卽婆羅門四韋陀典（一、壽，謂養生繕性。二、祠，謂享祭祈禱。三、平，謂禮儀占卜，兵法軍陣。四、術、謂異能咒醫。）。「惡王」：因弑父害母得名。「無道」：不忠孝。「刹利」：印度四姓之一，王種也。「旃陀羅」：屠者，亦四姓之一。殺父禽獸之類，以禽獸知母而不知父，殺母則禽獸不如，故云「未曾聞」。「汝不爲我耶」：賢臣去國必亡。「驚怖惶懼」：畏懼也。「懺悔」：懺梵語懺摩，請寬恕義。悔是華言惡作。懺是求來興善，悔是改往罰惡。普超經云：『阿闍世從文殊懺悔，得柔順忍（心柔智順，堪受實相，未及無生，無量壽經曰：一音響忍，二、柔順忍，三、無生忍。仁王伏忍、信忍、順忍、無生忍，所謂三賢十聖忍中行唯佛一人居淨土。）命終入寶吒羅地獄，卽入卽出，生上方佛土，彌勒出時復來此界，名不動菩薩，後當作佛，號淨界如來。』權現害母逆罪尚通懺悔，況餘人輕重垢乎，若不容懺，佛道無從，闍王若不行逆，其母何能求佛願生淨土，故以此爲發起。

時韋提希被幽閉已，愁憂憔悴，遙向耆闍崛山，爲佛作禮，而作是言，如來世尊，在昔之時，恒遣阿難來慰問我，我今愁憂，世尊威重無由得見，願遣目連尊者阿難與我相見。作是語已，悲泣兩淚，遙向佛禮。

本節文爲發起序中，阿闍世害母，其母因禁請佛。「愁憂」：心意悲苦。「憔悴」：形容枯槁。「恒遣」：應攝受者而攝受之。「阿難」：此云慶喜，又云無染，佛成道日生，白飯王子，如來堂弟也（三藏法數及釋氏譜云，四王生八子，一、淨飯王二子——（一）悉達多，（二）難陀。二、白飯王二子——（一）調達，（二）阿難。三、斛飯王二子——（一）摩訶男拘利，（二）阿那律。四、甘露王二子——（一）娑婆，（二）跋提。）。目連爲門師，阿難爲佛侍，故偏請二人，居在深宮不便偏一

未舉頭頃，爾時世尊，在耆闍崛山知韋提希心之所念，卽敕大目犍連及以阿難，從空而來，佛從耆闍崛山沒，於王宮出。時韋提希禮已，舉頭見世尊釋迦牟尼佛，身紫金色，坐百寶蓮華，目連侍左，阿難侍右，釋梵護世諸天在虛空中，普雨天華，持用供養。

本節文爲發起序中，佛與弟子因請往赴。「知韋提希心之所念」：他心通。「山沒宮出」：意生身顯神通也。頻娑請求受戒，故遣弟子往授，夫人求生淨土，必佛親來開示。「釋迦牟尼」：翻能仁寂默，取從智慧利物不住涅槃，智慧冥理不住生死之義。「紫金色」：清淨德性熏成。「蓮華坐」：表念佛三昧。「釋梵」：欲界主帝釋天，三界主大梵天。「護世」：護世四大天王，須彌山腰，六欲天之一，東持國，南增長，西廣目，北多聞。「諸天」：泛指三界諸天。「天華」：曼陀羅此云適意白花也，曼殊沙此云柔軟赤花也，表因趣果義。毘奈耶偈云：『假使百千劫所作業不亡，因緣會遇時，果報還自受。』楞伽云：『若有實造五逆罪者唯除覺了自心遇善知識方

證解脫。』楞嚴云：『殺彼命者，除奢摩他及佛出世不可停寢。』是以念佛、求生為解怨解結之要訣，超生脫死之良方。

時韋提希，見佛世尊，自絕瓔珞，舉身投地，號泣向佛白言，世尊，我宿何罪生此惡子，世尊復有何等因緣與提婆達多共為眷屬。唯願世尊為我廣說，無憂惱處，我當往生，不樂閻浮提濁惡世也，此濁惡處，地獄餓鬼畜生盈滿，多不善聚，願我未來不聞惡聲，不見惡人，今向世尊五體投地，求哀懺悔，唯願佛日教我觀於清淨業處。

本節文為發起序中最後一段，韋提希見佛傷嘆請法。「自絕瓔珞」：去意中貪。「舉身投地」：捨身淫殺。「號泣向佛」：斷妄語依佛口。問自身與惡子因，前已略說，即頻婆往日毗富羅山遊行獵鹿，空無所獲，遇一仙人正坐，使人驅逐令去，遂刺殺之，臨終惡念，願我來生還如今日，心口害汝。世尊與調達共為眷屬因緣，昔於錠光佛時，釋迦為摩納童子，就珍寶仙人學習既成，念欲報恩，自惟貧乏，于時耶若達欲嫁女，時有年老梵志求須摩提為女婿，摩納、須摩互辯，須摩提屈在言下，耶若達欣喜大賜珍寶與摩納，並將女妻之，須摩提生忿已極，發誓生生惱害，須摩提，調達は，女者瞿夷也。又涅槃報恩法句經云：調達教闍王放五百罪象蹋殺如來，佛入慈定舒乎五指指出五師子象見怖畏，後調達復以毒藥著指爪中意因禮拜中傷佛足，往而未到，地自裂開，出入地獄，闍王達多是逆行攝惡類，意令惡人不起逆罪，倘真實造逆，豈得世世與佛為伴耶。「閻浮提」：此云勝金，樹名。「濁」：五濁，劫見煩惱衆生命也。「惡」：十惡，身三殺、盜、淫，口四妄語、惡口、綺語、兩舌，意三貪、瞋、痴。「地獄」：梵語捺洛迦，此云苦具。「餓鬼」：梵語闍黎哆，此云祖父。「畜生」：梵語底栗車。「五體」：兩肘兩漆膝頭頂。「佛日」：如日除昏。序文竟。下正宗分。

爾時世尊，放眉間光，其光金色，徧照十方，無量世界，還住佛頂化為金台，如須彌山，十方諸佛淨妙國土皆於中現。或有國土

七寶合成，復有國土純是蓮華，復有國土如自在天宮，復有國土如玻璃鏡，十方國土皆於中現。有如是等無量諸佛國土，嚴顯可觀，令韋提希見。時韋提希白佛言，世尊，是諸佛土雖復清淨，皆有光明，我今樂生極樂世界阿彌陀佛所，唯願世尊教我思惟，教我正受。

「眉」：表中道。「光」：表智。觀佛海三昧經云，眉間毫相，長一丈五尺，周圍五寸，如瑠璃筒，從中發光。「佛頂」：無見頂相，表第一義諦。「金臺」：表實相體。「須彌」：唐云妙高，山王也。「皆於中現」：表從體起用。「七寶合成」：如南方寶生佛土等，示七菩提行。「純蓮花」：如西方蓮華世界。「自在天宮」：他化天，如北方自在天王世界。「玻璃鏡」：如東方琉璃世界。「清淨」：斷德。「光明」：智德。「極樂世界」：此云安養。「阿彌陀」：此云無量壽，亦云無量光。「思惟」：散心度量，有願之思，約慧言。「正受」：一心繫念，淨土觀法。約定言。

爾時世尊即便微笑，有五色光，從佛口出，一一光照頻婆娑羅王頂，爾時大王，雖在幽閉，心眼無障，遙見世尊，頭面作禮，自然增進，成阿那含。

「微笑」：一答夫人樂因，二答夫人樂果。「五色」：表破五陰超五濁成五法身。「從佛口出」：表法王子皆從佛口法化所生。「王頂」：表一切智果出人天上。「心眼無障」：即凡心見佛心，依肉眼見佛眼。「增進」：增道損生轉凡為聖。「阿那含」：此云不還，欲界見思斷盡，不來欲界受生死，即三果羅漢。

爾時世尊告韋提希，汝今知不，阿彌陀佛去此不遠，汝當繫念，諦觀彼國淨業成者，我今為汝廣說衆譬，亦令未來世一切凡夫欲修淨業者，得生西方極樂國土，欲生彼國者當修三福，一者孝養

父母，奉事師長，慈心不殺，修十善業，二者受持三皈，具足衆戒，不犯威儀。三者發菩提心，深信因果，讀誦大乘，勸進修者，如此三事名爲淨業，佛告韋提希，汝今知不，此三種業，乃是過去、未來、現在三世諸佛，淨業正因。

「不遠」：心迷淨土遠，心悟在眼前，佛加光現故不遠。「繫念」：事一心。「諦觀」：理一心。「衆譬」：指後文觀法。「三福」：一是共凡夫業，二是共小乘業，三是共大乘業。「十善業」：身除三邪，口除四過，意斷三惡。兼行放生、布施、梵行、誠實、質直、和諍、柔軟、不淨、慈悲、因緣，十善也。「三皈」：佛者覺也，法者正也，僧者淨也。「具足衆戒」：在家五戒，沙彌（尼）十戒，比丘二百五十戒，比丘尼三百五十戒，菩薩十重四十八輕戒，在家菩薩六重二十八輕戒。「威儀」：行住坐臥，廣則三千威儀。「發菩提心」：成正覺心，省庵開八心相，邪正眞僞大小偏圓知所取捨，立十因緣助成菩提心，卽念佛恩、父母恩、師長恩、施主恩、衆生恩、生死苦、重己靈、懺悔業障、求生淨土、令正法久住。「因果」：從因至果通三世，種瓜得瓜，種豆得豆，善惡到頭終有報，只因來早與來遲。「讀誦大乘」：解行也。「勸進」：修三福生淨業。佛告下是歎顯，憶佛念佛必定見佛，若把心地掃，何處非淨地。心外無佛，佛外無心，心有想則痴，無想則泥洹。

佛告阿難及韋提希，諦聽諦聽，善思念之，如來今者爲未來世一切衆生爲煩惱賊之所害者，說清淨業，善哉韋提希，快問此事，阿難汝當受持，廣為多衆，宣說佛語，如來今者教韋提希，及未來世一切衆生，觀於西方極樂世界，以佛力故，當得見彼清淨國土，如執明鏡，自見面像，見彼國土極妙樂事，心歡喜故。應時卽得無生法忍，佛告韋提希，汝是凡夫，心想羸劣，未得天眼，不能遠觀，諸佛如來有異方便，令汝得見，時韋提希白佛言，世

尊，如我今者，以佛力故，見彼國土，若佛滅後，諸衆生等，濁惡不善，五苦所逼，云何當見阿彌陀佛極樂世界。

「諦聽」：生聞慧。「善思」：生思慧。「念之」：生修慧。「煩惱賊」：煩惱能損慧命傷法身，故曰賊。「受持」：智論云，智力故受，念力故持。受於心持之恒，自利也。「廣為衆說」：利他。「執」：譬修持。「鏡」：譬觀心。「像」：譬土境。「無生法忍」：妙玄一實位云，若人初住破無明是明圓教無生忍位。若依別教，十信伏忍、十住信忍、十行去順忍、十地無生忍、妙覺寂滅忍。圓教五品伏忍，六根清淨信順二忍，初住至等覺無生忍，妙覺寂滅忍。如來將說十六觀法，預彰所說是圓妙觀。「韋提」：示同凡夫。「天眼」：天眼通非礙、肉眼礙非通、法眼唯觀俗、慧眼了知空、佛眼如千日照異體還同。「異方便」：卽十六觀。起信論云，如來有勝方便，攝護信心，謂以專意念佛因緣隨願得生他方佛土常見於佛。「時韋提希白佛言世尊如我今者」下：為佛滅後衆生請。「濁」：五濁。「惡」：十惡。「五苦」：五道非樂。或去地獄燃燒苦，餓鬼饑餓苦，畜生屠割死，人間八種苦，天上五衰苦。

下文正明十六觀，一、日觀、二、水觀、三、地觀、四、樹觀、五、池觀、六、總想觀（上六觀觀依報功德日為送想之方，水表瑠璃之地，雖此土物，意顯彼邦。）七、華座觀、八、佛菩薩像觀、九、佛身觀、十、觀音觀、十一、勢至觀、十二、普往生觀、十三、雜明佛菩薩觀（上七觀觀正報相好，座為三聖親依，像類三聖真體。）十四、上輩生觀、十五、中輩生觀、十六、下輩生觀（上三觀明三輩往生）。以妙三觀，觀十六境，隨事歷境繫念入理，境殊觀妙理等豈不生彼，如般舟三觀歷念佛事，方等三觀歷持咒事，法華三觀歷誦經事，請觀音三觀歷數息事。

佛告韋提希，汝及衆生，應當專心繫念一處，想於西方。云何作想，凡作想者，一切衆生，自非生盲，有目之徒，皆見日沒。當起想念，正坐西向，諦觀於日沒之處，令心堅住，專想不移，見

日欲沒，狀如懸鼓，既見日已，閉目開目，皆令明了，是爲日想，名曰初觀。

文內佛告下至想於西方句，示令繫心一處，云何下至皆見日沒句，正明日作觀爲所觀之境，當起下至皆令明了句，正教觀法，是爲下結。「專心」：觀住於理。「繫念」：想注於事。「一處」：法界一相，卽西方境。所謂心多馳散三昧難成，專想不移，往生易得。「非生盲」：非小機，顯韋提希昔日有目而今盲者亦可修之。「日沒」：日沒於西，以日爲境繫心向西。「諦觀於日欲沒之處令心堅住專想不移」：能觀之心所觀之境（日爲心現），以心觀心凝爲一體，彼此空寂無礙泯一切法，空觀也。心境均爲法界，緣起似有出沒，立一切法假觀也。雖境空緣起二諦觀，而本性堅住不移，且能統一切法，中觀也。四教儀云：『常境無相，無相而相三諦宛然。常智無緣，無緣而緣無非三觀。』能如是觀，則狀如懸鼓之日，不受閉目開目之見了。餘十五境以圓三觀觀之例知。又無量壽經下卷云，以疑惑心修諸功德願生彼國，不了佛智，生彼宮殿壽五百歲，常不見佛聞法，不見聖衆謂之胎生。又云乃至一念至心迴向願生彼國，卽得往生，住不退轉，唯除五逆謗誹正法。往生者必以佛智正觀加強信心，厭此欣彼之願心，觀罪性本空，懺心之行，方論品位化生。

次作水想，見水澄清，亦令明了，無分散意，既見水已，當起冰想，見冰映徹，作瑠璃想，此想成已，見瑠璃地，內外映徹，下有金剛七寶金幢，擎瑠璃地，其幢八方，八楞具足，一方面，百寶所成，一一寶珠，有千光明，一一光明，八萬四千色，映瑠璃地，如億千日，不可具見，瑠璃地上，以黃金繩，雜廁間錯，以七寶界分齊分明，一一寶中，有五百色光，其光如華，又似星月，懸處虛空，成光明台，樓閣千萬，百寶合成，於台兩邊，各

有百億華幢，無量樂器，以為莊嚴，八種清風，從光明出，鼓此樂器，演說苦空無常無我之音，是為水想，名第二觀。

此以即心之水所觀之境，文為四，先作水想，次變水成冰，再變冰為瑠璃，後觀瑠璃以成大地內外映徹。地下金剛寶柱承擎地上諸相莊嚴，出妙音演小隱大之法。「八種清風」：無量壽經上卷云，亦無四時春秋冬夏，不寒不熱常和調適。四方四維八種風鼓動樂器演妙法，不若此土令物生長衰落。

此想成時，一一觀之，極令了了，閉目開目，不令散失，唯除食時，恒憶此事，如此想者，名為粗見極樂國地，若得三昧見彼國地，了了分明，不可具說，是為地想，名第三觀。佛告阿難，汝持佛語，為未來世一切大眾，欲脫苦者，說是觀地法，若觀是地者，除八十億劫生死之罪，捨身他世，必生淨國，心得無疑，作是觀者，名為正觀，若他觀者，名為邪觀。

以地為所觀境，文仍分四：一、漸觀，重述前觀假想地上諸相莊嚴，以觀弱未能盡稱極樂勝境，故云「粗見極樂國地。」二、實觀，以三昧為主，所見「不可具說」，沉觀心淨穢互見，四土隨顯。三佛告下明利益，前水想是托此方水成冰，表彼邦寶地，故云粗見，不能滅罪，意使策進三昧耳。地觀是定中實見彼地，故能除斷八十億劫生死之罪，又結地例餘觀均有此益。四顯觀邪正。觀與境合，稱性而見，斷惑證真，名正觀，相與經異，見生欲愛，即為魔事，名邪觀。

佛告阿難，及韋提希，地想成已。次觀寶樹，觀寶樹者，一一觀之，作七重行樹想，一一樹高八千由旬，其諸寶樹七寶華葉，無不具足。一一華葉，作異寶色，瑠璃色中，出金色光，玻璃色中，出紅色光，碼碯色中，出砮磔光，砮磔色中，出綠真珠光，珊瑚琥珀，一切眾寶，以為映飾，妙真珠網，彌覆樹上，一一樹

上，有七重網，一一網間，有五百億妙華宮殿，如梵王宮。諸天童子，自然在中，一一童子，五百億釋迦毗楞伽摩尼，以爲瓔珞，其摩尼光，照百由旬，猶如和合百億日月，不可具名，衆寶間錯，色中上者，此諸寶樹，行行相當，葉葉相次，於衆葉間，生諸妙華，華上自然有七寶果，一一樹葉，縱廣正等二十五由旬，其葉千色有百種畫，如天瓔珞有衆妙華，作閻浮檀金色，如旋火輪，宛轉葉間，涌生諸果，如帝釋瓶。有大光明，化成幢幡，無量寶蓋、是寶蓋中，映現三千大千世界一切佛事，十方佛國，亦於中現，見此樹已，亦當次第一一觀之。觀見樹莖枝葉華果，皆令分明。是爲樹想，名第四觀。

第四樹觀文爲三，初明結前生後，次觀寶樹下正明觀行，是爲下結，正觀中有五：一、觀寶樹者至無不具足明樹體。二、一一華葉至如梵王宮明莊嚴相。三、諸天童子至如帝釋瓶明生法。四、有大光明至次第一一觀之明觀佛土。五、觀見樹莖至皆令分明，結觀。

「由旬」：一小由旬等於四十華里，中由旬六十里，大由旬八十里。

「瑠璃」：具云吠瑠璃，此云不遠，西域有山去波羅奈不遠，此寶出彼故名之。梵語蘇伐羅，此云金。「玻瓈」：此云水玉，又云白珠，似此方水晶。「瑪瑙」：梵語摩羅伽隸，具赤白二色。「碑磔」：此云大貝，青白色寶。「綠真珠」：梵語摩羅伽陀，大論云：此珠金翅鳥口邊出，綠色能辟一切毒。「珊瑚」：鉢羅娑福羅，此云珊瑚樹，生海底，碧色。「琥珀」：梵語河濕摩揭羅，色缸。「妙真珠」：梵語因陀羅網，大論云，天赤珠。「梵王宮」：大梵天王所住宮殿。「釋迦毗楞伽」：此云能勝。「摩尼」：此云無垢，又云增長，增長威德故，舊翻爲如意，楞嚴三昧云，帝釋於善法堂中著釋迦毗楞伽摩尼瓔珞。「畫」：線條也。「閻浮檀」：此云勝金，閻浮樹果水汁點物成金，因流入河染石成金，其色赤黃兼帶紫燄。「帝釋瓶」：帝釋天有一器名功德瓶，隨所須物皆從瓶出，花涌衆果亦爾。「三千」：指

極樂。「十方」：指他邦。「觀見樹莖枝葉華果」：雖因光蓋見十方土，然從樹起，故結末歸本。

次當想水，欲想水者，極樂國土有八池水。一一池水七寶所成，其寶柔輒，從如意珠王生，分爲十四支，一支作七寶妙色，黃金爲渠，渠下皆以雜色金剛以爲底沙，一一水中有六十億七寶蓮華，一一蓮華團圓正等十二由旬。其摩尼水，流注華間，尋樹上下。其聲微妙，演說苦空無常無我諸波羅密：復有讚歎諸佛相好者，如意珠王涌出金色微妙光明，其光化爲百寶色鳥，和鳴哀雅，常讚念佛念法念僧。是爲八功德水想，名第五觀。

第五池觀，又名八功德水想，文分五：一、從次當至有八池水，明池體。二、從一一池水至十二由旬，明池相。三、從其摩尼水至尋樹上下，明隨心適意。四、從其聲微妙至念僧，明利益。五、末二句結觀。水聲說法，苦空等是說小，諸度相好是說大。又讚三寶，亦有自性別相之殊。「哀雅」：慈曰雅，悲曰哀。「八功德水」：澄淨、清涼、甘美輕輒、潤澤、安和、除飢、長養。

衆寶國土，一一界上有五百億寶樓。其樓閣中有無量諸天作天伎樂，又有樂器懸處虛空，如天寶幢，不鼓自鳴，此衆音中皆說念佛念法念比丘僧。此想成已，名爲粗見極樂世界寶樹寶地寶池，是爲總想觀，名第六觀。若見此者、除無量億劫極重惡業，命終之後，必生彼國。作是觀者名爲正觀，若他觀者名爲邪觀。

第六總觀文分四，初總觀寶樓寶樹寶地寶池，分界上樓閣，樓中作樂，空中樂器自鳴，演出念三寶聲。「衆音」：指天樂、空樂二種音。樓閣天樂爲所緣境，一一唯心所成。二、此想下至名第六觀，結成總觀。三、若見下至必生彼國，明利益。四、作是觀者下至名爲邪觀，顯觀邪正。此觀與前地

觀及後諸觀滅罪數量多少，皆是佛智如量言之，非餘者所能道也。

佛告阿難，及韋提希，諦聽諦聽善思念之，吾當爲汝分別解說除苦惱法，汝等憶持，廣爲大眾分別解說。說是語時無量壽佛住立空中，觀世音、大勢至是二大士侍立左右。光明熾盛，不可具見，百千閻浮檀金色，不得爲比。時韋提希，見無量壽佛已，接足作禮，白佛言：世尊，我今因佛力故，得見無量壽佛及二菩薩。未來衆生，當云何觀無量壽佛及二菩薩。佛告韋提希，欲觀彼佛者，當起想念，於七寶地上作蓮華想。令其蓮華一一葉上，作百寶色，有八萬四千脉，猶如天畫，脉有八萬四千光，了了分明皆令得見，華葉小者，縱廣二百五十由旬，如是蓮華具有八萬四千葉。一一葉間，有百億摩尼珠王，以爲映飾，一一摩尼珠放千光明，其光如蓋，七寶合成，徧覆地上。釋迦毘楞伽寶、以爲其台，此蓮華台，八萬金剛甄叔迦寶，梵摩尼寶，妙珍珠網以爲校飾。於其台上，自然而有四柱寶幢，一一寶幢，如百千萬億須彌山幢上寶幔，如夜摩天宮，復有五百億微妙寶珠以爲映飾，一一寶珠有八萬四千光，一一光作八萬四千異種金色。一一金色徧其寶土，處處變化，各作異相，或爲金剛台，或作眞珠網，或作雜華雲，於十方面，隨意變現，施作佛事。是爲華座想，名第七觀。

佛告阿難，如此妙華是本法藏比丘願力所成。若欲念彼佛者，當先作此華座想，作此想時，不得雜觀，皆應一一觀之，一一葉，一一珠，一一光，一一台，一一幢，皆令分明，如於鏡中，自見

面相，此想成者，滅除五萬億劫生死之罪，必定當生極樂世界，作是觀者，名爲正觀，若他觀者名爲邪觀。

前六觀明依報功德。第七華座想觀文分四，一從佛告至分別解說，勅聽許說。二從說是語至不得爲比，佛現身相。三從時韋提希至二菩薩，爲未來請云何觀三聖。四從佛告下至名爲邪說，如來酬請廣示五種觀門中之第一觀蓮華座。

觀蓮華座文分五：一、從佛告韋提希至異種金色，明成座法用並辯其相。（佛告下，明觀法之用。令其下，辯法座所成衆相。）初華色數量，（一一葉間下葉間珠光，（三）釋迦下華臺寶網，（四）於其下至異種金色，寶幢莊嚴。）二、從一一金色至施作佛事，明能隨機利物。三、是爲華想名第七觀，結觀。四、從阿難如此妙華下至願力所成，明由願力成。五、從若欲念佛下至名爲邪觀，明未來利益。

「無量壽佛觀世音大勢至」：悲華經云：過去善持劫，世界名珊提嵐，輪王名無諍念，生有千子，臣名寶海，生有一子號寶藏，出家成道仍號寶藏如來，因無諍念王願取淨土寶藏受無量壽佛記，王之第一不眴太子受觀世音號，補無量壽佛，名徧出一切光明功德山王如來，壽九十六億那由它百千萬億劫。王之第二子尼摩太子，受大勢至號，補功德山王，名善住珍寶山王如來。千子中有願取五濁成佛者，卽釋迦文是。「閻浮檀金色不得爲比」：閻浮檀金展轉比至迦葉身金，猶如聚墨，況佛光耶。智論云：在佛光邊譬如焦柱比閻浮金。「甄叔迦」：此云赤色，西域有甄叔迦樹，其華色赤，形大如手，此寶色似。「梵摩尼寶」：梵者白淨義。「夜摩天」：具云須夜摩，此云善時，以彼天光明無晝夜。「法藏願力」：魏譯無量壽經上卷云，過去錠光佛出，相次至五十三佛名世自在王，時有國王棄國捐王，行作沙門號曰法藏，佛爲廣說二百一十億諸佛剎土，天人之善惡，國土之粗妙，法藏聞已卽說四十八願：佛國無地獄餓鬼畜生。不再墮三惡道。國中天人身悉金色。形無好醜。識宿命。得天眼。得天耳。得他心智。得神足。無貪念。住正定聚。光明無量。壽命無量。聲聞緣覺不計其數。壽依本願修短自在。無不善

名。諸佛稱名。十念往生唯除五逆誹謗正法。菩提心修功德，願生者必現其前。繫念定生。滿三十二相。一生補處。食頃供養十方佛。所求如意。說一切智。得那羅延身。萬物光潔微妙。道場樹光無量色。得辯才智慧。辯才智慧無量。見諸佛世界如鏡像。樓池華樹以寶嚴飾。蒙光身心柔軟。聞名得無生法忍。不復爲女像。常修梵行。天人致敬。思衣衣至。得漏盡。隨願得見諸佛淨土。諸根具足。住定供諸佛。聞名生尊貴家。聞名具足德本。聞名皆得普等三昧。國中隨意聞法。聞名得不退轉。聞名得一二三忍（音響柔順無生）。否則不取正覺，今已成佛，現在西方安樂世界。「消滅五萬億劫生死之罪」：前地觀初見彼國地，除八十億劫罪，總觀通見彼國依報，除無量億劫罪，今觀始見華座較前勝故。

佛告阿難及韋提希，見此事已，次當想佛，所以者何，諸佛如來是法界身，入一切衆生心想中，是故汝等心想佛時，是心卽是三十二相八十隨形好，是心作佛，是心是佛，諸佛正徧知海，從心想生。是故應當一心繫念諦觀彼佛多陀阿伽度阿羅訶三藐三佛陀。想彼佛者，先當想像，閉目開目，見一寶像，如閻浮檀金色，坐彼華上。見像坐已，心眼得開，了了分明見極樂國，七寶莊嚴，寶地寶池寶樹行列，諸天寶幔彌覆其上，衆寶羅網滿虛空中，見如此事極令明了，如觀掌中。見此事已，復當更作一大蓮華，在佛左邊，如前蓮華等無有異，復作一大蓮華在佛右邊，想一觀世音菩薩像坐左華座，亦作金色如前無異，想一大勢至菩薩像坐右華座。此想成時，佛菩薩像皆放光明，其光金色照諸寶樹，一一樹下，亦有三蓮華，諸蓮華上，各有一佛二菩薩像，徧滿彼國。此想成時行者當聞水流光明及諸寶樹鳧鷹鴛鴦皆說妙法，出定入定，恒聞妙法。行者所聞出定之時，憶持不捨，令與修多羅合，若不合者，名爲妄想。若與合者，名爲粗想見極樂世

界，是爲像想，名第八觀。作是觀者，除無量億劫生死之罪，於現身中得念佛三昧。

第八佛菩薩像觀，文分三：一、從佛告下至從心想生，泛明諸佛法身自從心想生。二、從是故應當下至名第八觀，偏觀彼彌陀並示觀行。（一）想彼下正明像觀。（二）見像坐已下，因像見土。（三）見此事已下，觀二菩薩。（四）此想成時下，像光照樹。（五）一樹下，樹皆三像。（六）此想成時下，因定聞法。（七）行者所聞下，明與經合。（八）三、從作是觀者至念佛三昧修觀獲利。

「法界身」：智者疏云：『報佛法性身也，衆生心淨，法身自在，故言「入衆生心想中」，似白日昇天影現百川。』滿足始覺名報佛，究顯本覺名法性身，始本既冥法報相泯能應用自在。「三十二相八十隨形好」：佛陀三祇修福慧，更住百劫種相好，又名三十二大人相，具此相在家爲輪王，出家成正覺。智論云：『隨此間閻浮提中天竺國人所好，則爲現三十二相。』是心作佛是心是佛」：恐衆生不了彌陀與諸佛一身一智一用，自佛他佛異體，感召方人，特明心佛衆生三無差別之理。是心作佛，以修顯性，心淨則覺。是心是佛，性非修成，心外無佛。始學通六卽名作，終成卽是佛。「正徧知海從心想生」：三智融妙，甚深如海，心淨佛現曰生，大圓滿覺與我心體無二無別。「繫念」：事一心。「諦觀」：理一心。「多陀阿伽度」：秦翻如來。卽法身中諦。「阿羅訶」：秦翻應供。卽解脫俗諦。「三藐三佛陀」：秦翻正徧知。卽般若真諦。「見一寶像」：彼佛具足三號，像見必照究至假中。「令與修多羅合」：三藏十二部總稱修多羅，經詮定學，律詮戒學，論詮慧學，修觀見佛聞法均應與三學相應，楞嚴云，不作聖心名善境界，若作聖解，卽受羣邪（妄想）。信願未精純，觀行未深細曰「粗見」。「念佛三昧」：天臺十疑論名一相三昧，文殊般若經名一行三昧。文殊般若經云：『欲入一行三昧者，應當空閒，繫心一佛，隨彼方所，端身正向（正坐西向），能於一佛念念相續，卽見過現未來諸佛，若得是三昧者，諸經法門皆悉了知，如威光太子，於波羅密善眼莊嚴王佛所，得念佛三昧，十千法界，皆得通達。』

佛告阿難，及韋提希，此想成已。次當更觀無量壽佛身相光明。阿難當知無量壽佛，身如百千萬億夜摩天閻浮檀金色。佛身高六十萬億那由他恒河沙由旬，眉間白毫右旋宛轉，如五須彌山，佛眼如四大海水，青白分明。身諸毛孔演出光明如須彌山。彼佛圓光，如百億三千大千世界。於圓光中有百萬億那由他恒河沙化佛。一一化佛亦有衆多無數化菩薩以爲侍者。無量壽佛，有八萬四千相，一一相中，各有八萬四千隨形好，一一好中，復有八萬四千光明。一一光明，徧照十方世界，念佛衆生，攝取不捨。其光相好，及與化佛，不可具說，但當憶想，令心眼見。見此事者，卽見十方一切諸佛，以見諸佛，故名念佛三昧。作是觀者，名觀一切佛身，以觀佛身故，亦見佛心，佛心者，大慈悲是，以無緣慈攝諸衆生。作此觀者，捨身他世、生諸佛前、得無生忍，是故智者，應當繫心諦觀無量壽佛。觀無量壽佛者，從一相好人，但觀眉間白毫，極令明了，見眉間白毫相者，八萬四千相好，自然當現。見無量壽佛者，卽得見十方無量諸佛，見無量諸佛故，諸佛現前授記，是爲徧觀一切色身相，名第九觀。作是觀者，名爲正觀，若他觀者，名爲邪觀。

第九觀佛眞法身，文爲五，初二句結前。二、從次當更觀下至念佛三昧，正觀佛身。(一)阿難下，觀身色。(二)佛身高下，觀身量。(三)身諸毛孔下，毛孔光。(四)彼佛圓光下，觀圓光。(五)於圓光下，光中化佛。(六)二化佛下，化佛侍者。(七)無量壽佛下，正示相好。(八)一一光明下，攝生。(九)其光相好下，見一佛。(十)見此事者下，至念佛三昧，見諸佛。(十一)三、從作是觀下至以無緣慈攝諸衆生，正明觀於佛心。四、從作此觀者，捨身他世下至名第九觀，舉利勸修。五、從作是觀者下，至文末，顯觀邪正。

「佛身高六十萬億那由他恒河沙由旬」：恒河沙三字譯者誤入。佛身高大乃淨土常所見佛，如法華中，淨光莊嚴國妙音菩薩欲來娑婆，彼佛誡云，汝身四萬二千由旬，我身六百八十萬由旬，汝往彼土，於佛菩薩勿生劣想。

「眉間白毫右旋宛轉如五須彌」：須彌山高八萬四千由旬，三百三十六萬里，縱廣亦爾，彼佛毫相過此五倍。「眼如四大海水」：一海八萬四千由旬，四海合三十三萬六千由旬。「八萬四千」：卽障顯德。「攝取不捨」：佛念衆生如母憶子，佛若不念善根則壞。「以觀佛身故亦見佛心」：心無形由色表，以身由心起，故見身卽見心，勝鬘云：『如來色無盡，智慧亦復然。』「以無緣慈攝諸衆生」：釋論有三種慈——照眞起法緣慈（無心觀法自然普照）。照俗起衆生緣慈（無心攀緣自然現益）。照中起無緣慈（無緣無心觀理平等）。「捨身他世，生諸佛前」：智者疏引般舟經云：衆生問佛何因緣得生彼國，彌陀佛答，以修念佛三昧得生我國也。「但觀眉間白毫」：八萬四千相好一一難觀，此觀若成八萬皆現。

止觀並輔行云：華嚴十華藏塵相，無量壽八萬四千相，法華三十二相，同是別圓道品修發，法身現相。金光明龍尊歎佛，經文但列三十二相圓光一尋，疏乃判云，正歎尊特。故三身非約相好多少而分，機見不同，起信論云，依分別事識凡夫二乘心所見者名爲應身，依於業識謂諸菩薩從初發意乃至菩薩究竟地心所見者名爲報身。小乘見法身義同生身，大乘見生身，義同法身，故法華中龍女讚佛，清淨妙法身具相三十二。丈六卽法界，故應持不見其頂，目連莫究其聲。生身百福所成，尊特色無分齊，法身色性卽智，不縱橫非三一。今經教相唯在圓頓，釋能觀之觀，是妙三觀，釋所觀境，是妙三身。若云觀音補彌陀，驗知佛有滅，此乃藏通機，見有生滅，別圓所見，一身一智慧，卽是常身不滅而無量。

佛告阿難及韋提希，見無量壽佛，了了分明已。次亦應觀，觀世音菩薩，此菩薩身長八十萬億那由他由旬。身紫金色。頂有肉髻。項有圓光，面各百千由旬，其圓光中，有五百化佛，如釋迦牟尼，一一化佛，有五百化菩薩，無量諸天以爲侍者。舉身光

中，五道衆生，一切色相，皆於中現。頂上毘楞伽摩尼寶，以爲天冠，此天冠中有一立化佛，高二十五由旬。觀世音菩薩，面如闍浮檀金。眉間毫相，備七寶色，流出八萬四千種光明，一一光明，有無量無數百千化佛，一一化佛，無數化菩薩以爲侍者，變現自在，滿十方世界。臂如紅蓮華色，有八十億微妙光明以爲瓔珞，其瓔珞中，普現一切諸莊嚴事。手掌作五百億雜蓮華色，手十指端，一一指端，有八萬四千畫，猶如印文，一一畫，有八萬四千色，一一色，有八萬四千光，其光柔軟，普照一切，以此寶手，接引衆生。舉足時，足下有千輻輪相，自然化成五百億光明台，下足時，有金剛摩尼華，布散一切，莫不彌滿。其餘身相衆好具足，如佛無異，唯頂上肉髻，及無見頂相不及世尊，是爲觀觀世音菩薩，真實色身相，名第十觀。佛告阿難，若欲觀觀世音菩薩者，當作是觀，作是觀者，不遇諸禍，淨除業障，除無數劫生死之罪。如此菩薩，但聞其名，獲無量福，何況諦觀？若有欲觀觀世音菩薩者，先觀頂上肉髻，次觀天冠，其餘衆相，亦次第觀之，悉令明了，如觀掌中。作是觀者，名爲正觀，若他觀者，名爲邪觀。

第十觀觀音，文分六，初二句結上。二從次復應觀觀世音菩薩下至莫不彌滿，正明觀菩薩身。(1)次復下觀身量。(2)身紫色金，觀身色。(3)頂有肉髻，觀肉髻。(4)項有圓光下，觀項光。(5)舉身光下，觀身光。(6)頂上毘楞伽下，觀天冠，冠立化佛者，表昔成果。(7)觀世音下，觀面色。(8)眉間毫相下，觀毫相。(9)臂如紅蓮華下，觀臂相。(10)手掌作下，觀手相。(11)舉足時下，觀足相。(12)三從其餘身相下至名第十觀，明與佛同異。四從佛告阿難至何況諦觀，舉益勸修。五從若有欲觀至如觀掌中，示觀次第。六作是觀者至

文末，顯邪正。

「身長八十萬億那由他由旬」：應為十八萬億，因彌陀身高僅六十萬億。「五道衆生一切色相」：合修羅在人天道中，正法念經云：心如畫師畫出五彩，黑卽地獄，青卽餓鬼，赤卽畜生，人天白色，修羅色黃，局人畜之間。「毘楞伽」：翻能聖。「肉髻」是相「無見頂」是好，相好表於極果，菩薩帶果行因，故「不及世尊」。「觀世音菩薩」：昔已成佛，今作因人助佛行化。法華普門品云：『真觀清淨觀廣大智慧觀，悲觀與慈觀。』五觀字卽空假中三觀，真觀諸法性空，清淨觀，度生無相，廣大智慧中道觀，以三觀與樂拔苦曰慈悲觀。『妙音觀世音，梵音海潮音，勝彼世間音。』五個音字卽眞俗中三諦境，妙音、智境相泯、觀世音、尋聲救苦，梵音眞空，海潮音隨俗，空有互攝，中道理顯，故「勝彼世間音」。

次觀大勢至菩薩，此菩薩身量大小亦如觀世音，圓光面各二十五由旬，照二百五十由旬，舉身光明照十方國，作紫金色，有緣衆生，皆悉得見。但見此菩薩一毛孔光，卽見十方無量諸佛淨妙光明，是故號此菩薩名無邊光，以智慧光，普照一切，令離三途，得無上力，是故號此菩薩名大勢至。此菩薩天冠，有五百寶華，一一寶華，有五百寶台，一一台中，十方諸佛淨妙國土廣長之相，皆於中現，頂上肉髻如鉢頭摩華，於肉髻上有一寶瓶，盛諸光明，普現佛事，餘諸身相，如觀世音，等無有異。此菩薩行時，十方世界一切震動，當地動處有五百億寶華，一一寶華，莊嚴高顯，如極樂世界，此菩薩坐時，七寶國土，一時動搖，從下方金光佛剎，乃至上方光明王佛剎，於其中間無量塵數分身，無量壽佛分身，觀世音大勢至皆悉雲集極樂國土，罽塞空中，坐蓮華座，演說妙法，度苦衆生。作此觀者，名爲觀見大勢至菩薩，是爲觀大勢至色身相，觀此菩薩者，名第十一觀。除無數劫阿僧

祇生死之罪，作是觀者，不處胞胎，常遊諸佛淨妙國土，此觀成已，名爲具足觀觀世音大勢至。

第十一大勢至觀，文分三：一、從文初至名大勢至，因光神力制二種名。二、從此菩薩天冠有五百寶下至名第十一觀，明與觀音同異。三、從除無數劫罪下至文末，勸修。

「大勢至」：梵語摩訶那鉢。思益云：投足之處震動三千大千世界及魔宮殿。「鉢頭摩華」：此云蓮華。「千輻輪相」：三十二相之一，足下有千輻輪之印紋。「罽塞」：罽音測，徧滿也。「具足觀觀世音大勢至」：觀音頂上化佛，勢至頂上寶瓶有異，餘皆相同。故智者疏云：『略無觀法，當不異上，故不重明。』

見此事時，當起自心，生於西方極樂世界，於蓮華中，結跏趺坐，作蓮華合想，作蓮華開想，蓮華開時，有五百色光，來照身想，眼目開想，見佛菩薩滿虛空中，水鳥樹林，及與諸佛，所出音聲，皆演妙法，與十二部經合，若出定之時，憶持不失，見此事已，名見無量壽佛極樂世界，是爲普觀想，名第十二觀。無量壽佛，化身無數與觀世音及大勢至常來至此行人之所。

第十二普觀，作自身往生想，彼國境界，一一具觀。下文第十三雜觀，現佛菩薩神力自在轉變非恒，大小不定，或隨物現，兩觀不同之點。普觀中文分二：一、從見此事時下至名第十二觀，作自身往想。二、從無量壽佛化身下至文末，現佛及菩薩化身來現。

前文第一觀至第五觀，別觀依報，第六觀總觀依報寶樓、寶樹、寶地、寶池四事。今想生彼並普見普聞。上品上生乘金剛臺，上品中生乘紫金臺，上品下生入金蓮華，今三聖觀成方修普觀，而坐蓮華者，以紫金臺到彼成大寶華，經宿則開，此文亦云作開合想，當屬上品中生，若上品下生，華開七日乃得見佛。下雜觀三輩，觀成者，方是上上品。

佛告阿難，及韋提希，若欲至心生西方者，先當觀於一丈六像在池水上。如先所說無量壽佛，身量無邊，非是凡夫心力所及，然彼如來宿願力故，有憶想者必得成就。但想佛像得無量福，況復觀具足身相。阿彌陀佛神通如意，於十方國變現自在，或現大身滿虛空中，或現小身丈六八尺，所現之形皆真金色，圓光化佛及寶蓮華，如上所說。觀世音菩薩及大勢至，於一切處，身同衆生。但觀首相，知是觀世音，知是大勢至，此二菩薩助阿彌陀佛普化一切，是爲雜想觀，名第十三觀。

從第七華座觀至第十三雜想觀，爲觀正報相好。本文分三：一、文初至池水上，明觀丈六像。二、從如先所說無量壽佛下至具足相，明無量壽佛身量無邊。三、從阿彌陀下至文末，明彌陀變現自在，補處示同人法。

此觀爲前觀三聖不成，乃令捨由旬身觀丈六像，或前觀勝相已就令其更觀大小化用。此亦四教根性所見不同，圓教行者，則見以虛空爲座，成清淨法身。別教行者，則見坐蓮華藏世界大寶華王座，現圓滿報身。通教行者，則見以天衣爲座，現帶劣勝應身，藏教行者，則見以生草爲座，成劣應身。況三身互顯，法身有自性清淨，報身有自他受用，應身有勝劣，自性法身是性具，清淨法身卽自受用報身，勝應身卽他受用報身，劣應身卽丈六應化身。「一丈六像在池水上」：捨勝觀劣，未觀二菩薩，先觀彌陀托彼蓮華，像在池水上。「但觀首相」：頂上華冠中有一立化佛者觀音也，勢至頂上有寶瓶。

佛告阿難及韋提希，上品上生者。若有衆生願生彼國者，發三種心，卽便往生，何等爲三，一者至誠心，二者深心，三者迴向發願心，具三心者，必生彼國，復有三種衆生，當得往生，何等爲三，一者慈心不殺，具諸戒行，二者讀誦大乘方等經典，三者修行六念，迴向發願，願生彼國，具此功德，一日乃至七日，卽得

往生。生彼國時，此人精進勇猛，故阿彌陀如來與觀世音大勢至，無數化佛，百千比丘，聲聞大眾，無量諸天，七寶宮殿，觀世音菩薩執金剛台，與大勢至菩薩至行者前，阿彌陀佛放大光明，照行者身，與諸菩薩授手迎接，觀世音大勢至與無數菩薩，讚歎行者，勸進其心。行者見已，歡喜踴躍，自見其身，乘金剛台，隨從佛後，如彈指頃，往生彼國。生彼國已，見佛色身，衆相具足，見諸菩薩色相具足，光明寶林演說妙法，聞已卽悟無生法忍，經須臾間，歷事諸佛，遍十方界，於諸佛前，次第受記，還至本國，得無量百千陀羅尼門。是名上品上生者。

第十四上輩生觀，分上品上生、上品中生、上品下生，今初上品上生。天親所造往生論有十七成就，其十六大義門成就中偈云：『大乘善根界，等無譏嫌名，女人及根缺，二乘種不生。』此就已生彼國者言，未生者雖屬二乘女人根缺三種過，一經大乘善根發無不往生。法藏三十五願云，其有女人聞我名字，壽終之後，復爲女像者不取正覺。又無量壽經說五逆謗法不得生，今經逆罪得生，專視能否懺悔，如世王於涅槃會重悔，其罪消薄，容使得生，下根造逆，多不重悔，故不得生。俱舍云，愚智所犯輕重不同，愚作罪小亦墮惡，智爲罪大亦脫苦。涅槃云，智者有二，一者不造諸惡，二者作已懺悔。愚者亦有二，一者作罪，二者覆藏。總之，一切善若能迴向皆淨土因，一切惡若能懺願亦淨土因也。智者疏云：『上品位當道種（別教十向伏無明證行不退），中品位當性種（別教十行斷界外塵沙），下品位當習種（別教十住重勝解，又名十解，證位不退。）。』又云：『上品之人始從習種終至解行菩薩（別教相似位，地前內凡三賢，對圓教十信內凡位），中品者從外凡十信已下（別教觀行位，外凡十信，對圓教五品外凡位），下品卽今時悠悠凡夫（卽對圓名字位，通修未修人，別教仰信眞如法性，藉緣修助眞修。圓教了知一色一香無非中道，理具事造兩重三千同在一念。）。』疏用三位判九品（相似三賢當上三品，觀行十信當中三品，名字全未伏惑當下三

品)以別位從名字成觀行人相似，歷乎九品，對品顯機廣。四明知禮妙宗鈔云：『先觀落日於西定心，疏云，除五逆罪下品自論，故知觀想落日成，當下下品。次以三觀想水結冰，合在下中。轉想琉璃粗見彼地，可對下上。若得三昧，見彼寶地及寶樹寶池，雖五品初，而五住圓伏，名得三昧，品當中下。總見依報，五品中心，合當中中。華座觀成，五品後心，即中上品。此之三品，雖成三昧，能伏五住，見惑未斷，事識猶存，未可即觀勝妙身相，故修三觀，觀於寶像，像想現前，見思俱盡，即登圓七信，即上下品。事識既盡，全依業識，可觀三聖眞法之身，及普觀成，在八九信，即上中品。後修雜觀及三輩觀成，當第十信，即上上品。如觀勝相不成就者，始依雜觀及丈六身，節節改觀次第入品』。文云「聞已即悟無生法忍」，即由別十向道種性，進入別地圓住聖種性，證念不退。

初從文初至上品上生者，標名。二從若有衆生下至即得往生，明修因。三從生彼國時下至勸進其心，明值緣。四從行者見已下至彼生彼國，正明得生。五從生彼國已下至陀羅尼門，明生後利益。六文末結。「至誠心」：正念眞如，法身德。「深心」：集諸善行，般若德。「廻向發願心」：悲心拔苦，解脫德。「慈心不殺具諸戒行」：無緣慈不害物命，知性離非，心具諸戒。「讀誦大乘方等經典」：隨文成觀。「六念」：佛法僧施戒天。「總持」：一能持善，二能遮惡。「一日乃至七日即得往生」：須約斷伏而論，豈令初修六念，三惑尚熾，便登極品耶？

上品中生者，不必受持讀誦方等經典，善解義趣，於第一義，心不驚動，深信因果，不謗大乘，以此功德廻向願求生極樂國。行此行者，命欲終時，阿彌陀佛與觀世音大勢至，無量大眾，眷屬圍繞，持紫金台，至行者前，讚言法子，汝行大乘，解第一義，是故我今來迎接汝，與千化佛一時授手。行者自見坐紫金台，合掌叉手讚歎諸佛，如一念頃，即生彼國，七寶池中，此紫金台，如大寶華，經宿則開。行者身作紫磨金色，足下亦有七寶蓮華，

佛及菩薩俱時放光，照行者身，目卽開明，因前宿習，普聞衆聲，純說甚深第一義諦，卽下金台，禮佛合掌讚歎世尊，經於七日，應時卽於阿耨多羅三藐三菩提得不退轉，應時卽能飛行徧至十方歷事諸佛，於諸佛所，修諸三昧，經一小劫，得無生忍，現前受記。是名上品中生者。

上品中生者，文分六：初標。二從不必受持下至求生極樂國，明往生因。三從行此行者下至一時授手，明值緣。四從行者自見下至經宿則開，明得生。五從行者身作下至現前受記，明往生利益。六文末結。「不必受持讀誦方等經典，善解義趣」：文多爲煩，依義不依文，少聞而取解者。「第一義心」：眞如實相如來藏法界，絕言思深廣之理。「不驚動」：不爲二邊所動。「深信因果」：了知十界因果，皆唯心造。「不謗大乘」：是心作佛，是心是佛之理，絕不猶豫。「紫金台」：金剛天上之寶，紫金色間爲貴，蓮華染中之淨，紫金較前雖劣，望後則勝。「衆聲」：指水光林鳥之聲。「阿耨多羅三藐三菩提」：翻無上正等正覺，有實相實智方便三菩提。「一小劫」：人壽從一至八萬四千歲，百年遞次增減各一次爲一小劫。「受記」：受記有四種——未發心記、密記、現前記、無生記。經一小劫得無生忍者，義當聖種性念不退位，經七日得不退者，義當道種性，行不退也。

上品下生者。亦信因果，不謗大乘，但發無上道心，以此功德，迴向願求，生極樂國。行者命欲終時，阿彌陀佛及觀世音大勢至，與諸菩薩持金蓮華，化作五百佛來迎此人，五百化佛一時授手，讚言法子，汝今清淨發無上道心，我來迎汝。見此事時，卽自見身坐金蓮華，坐已華合，隨世尊後，卽得往生七寶池中。一日一夜蓮華乃開，七日之中乃得見佛，雖見佛身，於衆相好，心不明了，於三七日後，乃了了見，聞衆音聲，皆演妙法，遊歷十

方，供養諸佛，於諸佛前，聞甚深法，經三小劫，得百法明門，住歡喜地。是名上品下生者，是名上輩生想，名第十四觀。

上品下生文分六，初標。二從亦信因果下至生極樂國，明往生之國。三從行者命欲終時下至我來迎汝，明值緣。四從見此時至生七寶池中，明得生。五從一日一夜下至住歡喜地，明生後利益。六文末結。

「百法明門」：於初地所得之智慧門也，明者慧也，門者入也，慧能通入百法之真性，故曰明門。瓔珞經所說十信之百法，於初住（圓教）位修互具之十信，名百法明門。四明妙宗鈔：『三劫遊歷十方，供佛聞法，進入道種，登於初地（別教），此地即得百法明門。言百法者，如百法論所出名數。』百法明門論所說之五位百法，即心心所之百法也。清續法直指疏：『百法明門者，大乘家五位百法也，名數如百法論，總顯三界所有唯識所現。』「歡喜地」：別教初地名，破無明見法性位。

綜觀上輩上生，要發三心（志誠、深、迴向）修六念（佛、法、僧、施、戒、天）慈心具戒，讀經解義為因，感真佛化佛來迎，乘金剛台，到即華開，見佛聞法，悟無生忍，得陀羅尼。中生深信因果，解義不謗，迴向願生為因，感真佛與千化佛來迎，乘紫金台，經宿華開，七日後菩提不退，一小劫得忍受記。下生信因果，不謗法，發心願求為因，感真佛及五百化佛來迎，坐金蓮花，一日夜華開，七日見佛，三七聞法，三小劫住初地，因果品位雖有勝劣，望後中下皆名上輩。

佛告阿難，及韋提希，中品上生者。若有衆生受持五戒，持八戒齋，修行諸戒，不造五逆，無衆過患，以此善根，迴向願求，生於西方極樂世界。臨命終時，阿彌陀佛與諸比丘，眷屬圍繞，放金色光，至其所，演說苦空無常無我讚歎出家，得離衆苦。行者見已，心大歡喜，自見己身，坐蓮華台，長跪合掌，為佛作禮，未舉頭頃，即得往生極樂世界，蓮華尋開。當華敷時，聞衆

音聲，讚歎四諦，應時即得阿羅漢道，三明六通具八解脫。是名中品上生者。

第十五中輩生觀，分中品上生、中品中生、中品下生，今初中品上生。文分六初標，二從若有衆生下至西方極樂世界，明生因。三從臨命終時下至得離衆苦，明值緣。四從行者見已下至蓮華尋開，明得生。五從當華敷時下至文末，明生後利益。六後句結。「五戒」：不殺盜淫妄酒。「八戒齋」：又名八關齋戒，不殺等五戒，加六身不塗飾香鬘，七不自歌舞及往視聽，八不坐高廣大床，九不過中食，八戒一齋，成實論、智度論之意。若俱舍論意，合香鬘歌舞爲一，前七爲戒，後一爲齋。「諸戒」：七衆所受戒律不同，亦即三無漏學之戒學。「迴向願求」：以果驗因不專持戒，合修小乘理觀事禪，但未斷惑證果，故臨終前讚大願生。別教外凡十信中的第七迴向心，圓教外凡五品中的四五二品，通教內凡二地，藏教內凡四善根中之忍及世第一等伏惑位，是中品上生迴向人，若藏教煖頂位及五停心念處外凡位，須猛利迴向超人此品。「比丘」爲因，「阿羅漢」爲果，各含三義，乞士破惡怖魔、應供殺賊無生。「苦空無常無我」：觀身不淨是苦、觀受苦空、觀心無常、觀法無我，即四念處觀。「出家」：出三惑煩惱二種生死家，有長時始終盡形壽出家，有一日一夜身心清淨短時出家者，有四句料簡。「蓮華台」：戒能生定，由定生慧，故華有台。「四諦」：大經聖行品有四種四諦，凡夫有苦無諦，二乘有苦有諦，菩薩解苦無苦，餘三亦然。一生滅四諦，大經云：陰入重擔逼迫繫縛是苦諦，見愛煩惱能招來果是集諦，戒定慧無常苦空是道諦，二十五有子果縛斷是滅諦。二無生四諦，大經云：解苦無苦而有真諦，苦無逼迫相，集無和合相，道不二相，滅無生相。三無量四諦，苦有無量相，十法界不同，集有無量相，五住煩惱不同，道有無量相，恒沙佛法不同，滅有無量相，諸波羅密不同。四無作四諦，以迷理故，菩提是煩惱名集諦，涅槃是生死名苦諦，以能解故，煩惱即菩提名道諦，生死即涅槃名滅諦。四諦是聲聞法，如以佛道聲令一切聞，則通四教矣。據天親往生論說：『二乘種不生。』欲令定性迴小向大，定性取寂者不生，不定性或退菩提心二乘，臨終信願向大者得生，以習小功深，故彼佛稱習，仍呼二

乘。「三明」：娑沙云，宿命知過去苦生厭，天眼知未來苦令離，漏盡正觀斷惑。「六通」：天眼、天耳、他心、神足、宿命、漏盡。天耳聞聲，他心緣他別想，神足身如意，僅屬工巧，名通非明。大論云：直知過去等名通，知過去因緣行業名明。「八解脫」：亦名八背捨，背淨潔五欲捨離著心，一內有色相（修八色流光，內存骨人）外觀色（修不淨觀），位在初禪能脫自地及下欲界。二內無色相（二禪內淨，故壞滅內身骨人）外觀色（欲惑難斷仍觀外不淨色）位在二禪。三淨解脫身作證（外除不淨相，定中練地水火風青黃赤白八色光明，清淨皎潔故名淨，以涅槃法安著身中故云身證。）位在三禪。四空處（滅覺觀初禪、喜俱二禪、樂俱三禪、不動四禪，及前三解脫等色，緣空入定）。五識處（捨空緣識）。六無所有處（捨識緣無所有）。七非非想處（捨無有人非想定。進上離下，凡夫依六行觀，厭下苦粗障，欣上淨妙離，佛子則修八聖種觀，苦空無常無我對治上四空，如病癰瘡刺。）八滅盡、滅受想諸心數法。

中品中生者。若有衆生，若一日一夜，持八戒齋，若一日一夜持沙彌戒，若一日一夜持具足戒，威儀無缺，以此功德迴向願求，生極樂國，戒香熏修。如此行者，命欲終時，見阿彌陀佛與諸眷屬，放金色光，持七寶蓮華，至行者前，行者自聞空中有聲讚言，善男子，如汝善人，隨順三世諸佛教故，我來迎汝。行者自見坐蓮華上，蓮華即合，生於西方極樂世界，在寶池中，經於七日，蓮華乃敷，華既敷已，開目合掌，讚歎世尊，聞法歡喜，得須陀洹，經半劫已，成阿羅漢。是名中品中生者。

中品中生，文分六，初標。二從若有衆生下至戒香熏修，明生因。三從此行者下至我來迎汝，明值緣。四從行者自見下至極樂世界，明得生。五從寶池中下至成阿羅漢，明生後利益。六句結。

「十戒」：沙彌（尼）十戒，前八戒加不捉金銀生像，及不過中食。

「具足戒」：比丘(尼)二百五十戒及五百戒。「威儀」：行住坐臥不失佛法。「戒香」：戒、定、慧、解脫、解脫知見、五分法身香之一。取無餘涅槃之阿羅漢，卽灰泯此身智。「諸佛教」：諸惡莫作，衆善奉行，自淨其意，是諸佛教。「須陀洹」：初果羅漢名，斷八十八使見惑，十六心見道，六根不入六塵又曰逆流。

中品下生者。若有善男子善女人，孝養父母，行世仁慈。此人命欲終時，遇善知識，爲其廣說阿彌陀佛國土樂事，亦說法藏比丘四十八願。聞此事已，尋卽命終，譬如壯士，屈伸臂頃，卽生西方極樂世界。經七日已，遇觀世音及大勢至，聞法歡喜，得須陀洹，過一小劫，成阿羅漢。是名中品下生者，是名中輩生想，名第十五觀。

中品下生文分五，初句標。二從若有善男子下至行世仁慈，明得生之因。三從此人命終下至四十八願，明生緣。四從經七日下午至成阿羅漢，明生後利益。五從是名下結。

「孝養」：執勞侍奉，順色承志，爲人倫三綱之一，百行之本。「仁慈」：推愛及物博施濟衆爲五常之首，仁則不殺，義則不盜，禮則不淫，信則不妄語，智則不飲酒，雖爲世善，已具五戒。「遇善知識」：不爲名聞利養宏法爲家務度生是事業者。「阿彌陀佛國土樂事」：依報莊嚴，順性而取。「法藏比丘四十八願」：正報相好，稱理發願。「成阿羅漢」：因善知識稱性廣說彼國依正，與生者心合，自會迴向願求，通惑頓伏，在伏忍位。初果須陀洹斷八十八使見惑，二果斯陀含，此去一來斷欲界九品思惑中前六品。三果阿那含，此云不來，斷欲界九品思惑盡，進斷上八地思，四果阿羅漢三十四心斷三界見思盡，名無生。以上三品爲中輩生想，第十五觀。

綜觀中輩上生，持諸戒，無惡逆，願求爲因，感眞佛與比丘衆來迎，乘蓮花台，蓮華尋開，聞四諦法，得阿羅漢。中生持戒願求爲因，感眞佛來迎，坐七寶蓮華，經七日開，得須陀洹，半劫後成阿羅漢。下生孝養仁慈，

遇善知識爲因，感生極樂，經七日遇觀音勢至，聞法得初果，過一小劫成阿羅漢。

佛告阿難及韋提希，下品上生者。或有衆生，作衆惡業，雖不誹謗方等經典，如此愚人，多造惡法，無有慚愧，命欲終時，遇善知識，爲說大乘十二部經，首題名字，以聞如是諸經名故，除却千劫極重惡業。智者復教合掌叉手，稱南無阿彌陀佛，稱佛名故，除五十億劫生死之罪。爾時彼佛卽遣化佛化觀世音化大勢至，至行者前讚言善男子，以汝稱佛名故，諸罪消滅，我來迎汝。作是語已，行者卽見化佛光明徧滿其室，見已歡喜，卽使命終，乘寶蓮華，隨化佛後，生寶池中。經七七日，蓮華乃敷，當華敷時，大悲觀世音菩薩，及大勢至菩薩，放大光明，住其人前，爲說甚深十二部經，聞已信解，發無上道心，經十小劫，具百法明門，得入初地，是名下品上生者。

第十六下輩生觀分三品——下品上生、下品中生、下品下生，今初下品上生。文分六，初標。二從或有衆生下至生死之罪，明往生因。三從爾時彼佛至我來迎汝，明生緣。四從作是語已下至生寶池中，明得生。五從經七七日下至得入初地，明生後利益。六文末結。三業等惡雖滅，惑未全伏，位在名字，爲下三品。背小向大人別圓外凡，十信五品，爲中三品。以大乘諸善入別賢圓信，爲上三品。圓頓教說，罪無輕重，悔則皆滅。「十二部經」：又名十二分教，一修多羅此云契經、長行。二祇夜，此云應頌、重頌。三和伽那，此云授記。四伽陀，此云諷頌、孤起頌。五優陀那，此云無問自說。七阿波陀那，此云譬喻。八伊帝目多，此云本事。九闍陀伽，此云本生。十毘佛略，此云方廣。十一阿浮達摩，此云未曾有。十二優娑提舍，此云論義。

佛告阿難及韋提希下品中生者，或有衆生毀犯五戒八戒及具足戒，如此愚人偷僧祇物，盜現前僧物，不淨說法，無有慚愧，以諸惡業而自莊嚴，如此罪人，以惡業故，應墮地獄，命欲終時，地獄衆火，一時俱至，遇善知識，以大慈悲，卽爲讚說阿彌陀佛十力威德，廣讚彼佛光明神力，亦讚戒定慧解脫，解脫知見，此人聞已，除八十億劫生死之罪，地獄猛火，化爲清涼風。吹諸天華，華上皆有化佛菩薩，迎接此人。如一念頃卽得往生，七寶池中蓮華之內。經於六劫，蓮華乃敷，觀世音大勢至，以梵音聲，安慰彼人，爲說大乘甚深經典，聞此法已，應時卽發無上道心。是名下品中生者。

下品中生文分六，初標。二從或有衆生下至化爲清涼風，明生因。三從吹諸天華下至迎接此人，明緣。四從如一念頃下至蓮華之內，明得生。五從經於六劫下至無上道心，明生後獲利。六文末結。

「僧祇物」：十方僧衆物，謂厨庫華果等，常住供養十方衆僧等。「現前僧物」：調衣食藥具四事十方施與僧者。「不淨說法」：但求名利非益物也。「無有慚愧」：屏處爲惡不慚於天，顯露爲惡不慚於人，卽無羞恥也。「以諸惡業而自莊嚴」：日積月累成不善心境。「應墮地獄」：成論明極善極惡俱不經中陰。楞嚴云，一切世間生死相續，生從順習，死從變流。今火獄相現必墮無間。「十力」：一、覺處非處智力，二、知三世業報智力，三、知諸禪解脫智力，四、知種種解智力，五、知種種界智力，六、知一切所道智力，七、知三世因果智力，八、宿命力，九、天眼力，十、知永斷習氣智力。「威」：四無畏（一切智、漏盡、說障道、說盡苦道）。「德」：慈悲喜捨四無量心。「大乘甚深經典」：一切衆生皆有佛性，有佛性者，皆得作佛。

佛告阿難及韋提希，下品下生者。或有衆生作不善業，五逆十惡，具諸不善，如此愚人，以惡業故，應墮惡道，經歷多劫，受苦無窮，如此愚人，臨命終時遇善知識，種種安慰，爲說妙法，教令念佛，彼人苦逼，不遑念佛，善友告言，汝若不能念彼佛者，應稱無量壽佛，如是至心，令聲不絕，具足十念，稱南無阿彌陀佛，稱佛名故，於念念中，除八十億劫生死之罪。命終之時，見金蓮華，猶如日輪，住其人前。如一念頃，即得往生極樂世界。於蓮華中，滿十二大劫，蓮華方開，觀世音大勢至，以大悲音聲，爲其廣說諸法實相，除滅罪法，聞已歡喜，應時即發菩提之心。是名下品下生，是名下輩生想，名第十六觀。

下品下生，文分六，初標。二、從或有衆生下至生死之罪，明往生因。三、從命終之時下至住其人前，明緣。四、從如一念頃下至極樂世界，明得生。五、從於蓮華中下至發菩提心，明獲利。六文末結。

「五逆」：殺父殺母（擴及七世父母。理殺無明父貪愛母無罪）出佛身血殺羅漢（衆生即是佛，亦可成羅漢）破和合僧（身口意戒見利六和高尚之士，動其心毀其譽）。「十惡」：身三口四意三爲十惡。天台立六種善惡（一）人天五戒十善爲事善，報盡還墮爲惡。（二）二乘離三界苦爲善，不能利他則惡。大論云：『寧起惡癩野干心，不生聲聞辟支佛意。』（三）權菩薩兼濟爲善，不斷惑（最後一坐成覺）爲惡。（四）通教三乘同斷爲善，不見別中爲惡。（五）別教見中道爲善，隔歷爲惡，故涅槃經自白，由此以前我等皆爲邪見人耶。（六）圓菩薩順實相爲善，著之爲惡。止觀輔行云：『唯圓爲善，復有二意，一者以順爲善，以背爲惡，次以著爲惡，以達爲善。』以達著斷善惡之性。

無量壽經卷下云：『唯除五逆誹謗正法。』本經修圓頓觀法，了罪性本空，能悔卽銷，強調信贊大乘，兩種雖開遮不同，理無二致。大本云：『其

上輩者捨家棄欲而作沙門，發菩提心，一向專念無量壽佛修諸功德願生彼國。』『其中輩者，雖不能行作沙門，大修功德，當發無上菩提之心，一向專念無量壽佛，奉持齋戒起立塔像，飯食沙門，懸繪燃燈，散華燒香，以此迴向願生彼國。』『其下輩者，假使不能作諸功德，當發無上菩提之心，一向專意，乃至十念，念無量壽佛，願生彼國，若聞深法，不生疑惑，乃至一念，念於彼佛，以至誠心。願生其國。』按大本三輩往生條件，發菩提心一向專念，迴向願求奉持齋戒，修諸功德。至一念十念者，乃以不謗正法信而不疑，所謂疑則華不開，信則決定生，再如本經所說，遇善知識爲說妙法，衆苦所逼非散意念佛，加之法藏第十八願十念往生。大品云：若有一人稱南無佛，乃至畢苦，其福無盡。佛名經云：一聞佛名，滅無量劫生死之罪。調達獄中稱佛，變衆苦爲三禪樂。闍王懺悔得無根信（本時五根未立，初信無根。）「日輪」：佛日慧光。

綜觀下輩上品聞經題，稱佛號，雖造五惡，並不謗法，信願生西爲因，感化佛來迎，坐寶蓮華，經七七日，華開聞法，發菩提心，過十小劫登初地。中品破戒偷僧，雖不淨說法，並不謗法，故善知識讚佛威德，聞已願生爲因，感化佛來迎，坐天華，經六劫華開，聞法發心。下品十念稱名，雖造五逆，不謗淨土，重悔求生爲因，感金蓮華引生西方，經十二劫華開，聞實相，發菩提心。「實相」：喜怒未發，善惡未起，心意未動，泯對法，見法性，如鏡照物，不留痕跡。虛空不拒羣相而無增減。以上十六觀竟。

說是語時，韋提希與五百侍女，聞佛所說，應時即見極樂世界，廣長之相，得見佛身及二菩薩，心生歡喜，歎未曾有，豁然大悟，逮無生忍。五百侍女發阿耨多羅三藐三菩提心，願生彼國，世尊悉記，皆當往生，生彼國已，獲得諸佛現前三昧，無量諸天發無上道心。

本文分二，一夫人悟無生，二侍女發心。文相節段易知。

「廣長」：橫豎。「豁然大悟」：是心是佛，即聞即修頓入圓住。「逮

得無生」：全心作佛，理則頓悟，乘悟併銷。「發阿耨多羅三藐三菩提心」：夫人悟無生，位在別地圓住。侍女發無上正等覺心，淨名疏云：柔順忍方有發義，心柔智順，別教名字觀行亦有發義，唯去無生忍遠，多約別教相似內凡三賢位，證解行不退。以上正宗分竟。

爾時阿難，卽從座起，白佛言世尊，當何名此經，此法之要當云何受持，佛告阿難，此經名觀極樂國土無量壽佛，觀世音菩薩，大勢至菩薩，亦名淨除業障生諸佛前，汝當受持無令忘失。行此三昧者，現身得見無量壽佛及二大士，若善男子及善女人，但聞佛名，二菩薩名，除無量劫生死之罪，何況憶念。若念佛者，當知此人則是人中分陀利華，觀世音菩薩，大勢至菩薩爲其勝友，當坐道場，生諸佛家。佛告阿難，汝好持是語。持其語者，卽是持無量壽佛名。佛說此語時，尊者目犍連尊者阿難，及韋提希等，聞佛所說皆大歡喜。

本節文於王宮囑勸分先列名教持。二從行此三昧下至生諸佛家，明修有益，勸人奉信。三從佛告阿難下至無量壽佛名，付屬令持。四從佛說此語下至皆大歡喜，目連等歡喜。

「分陀利」：白蓮華。人間奇瑞性潔無染。「好」：淨念相繼事好，圓觀無間理好。「坐道場」得果，「生諸佛家」起行。「勝友」：二聖爲補處。「歡喜」：遇人聞法得果。聞思修，信願行，圓修圓具。目連阿難增道損生，夫人侍女得忍受記。釋梵諸天發心願往。

經文別釋三種淨業，十六妙觀，佛答經名卽以此爲總目，前文云當修三福，名爲淨業正因，初福教修人天事善，除報障，次福教持衆戒，淨業障，後福教發菩提心，斷煩惱障。第二、第三福業，爲淨業要術，持之勿失。十六觀中第六總觀，除億劫極重惡業。第九觀佛眞法身，生諸佛前得忍授記。第十觀觀音淨除業障。第十一大勢至觀，除無數劫阿僧祇生死之罪。「觀極

樂國土」：即第六總觀。「無量壽佛」：即第九觀佛眞法身。「觀世音菩薩」即十觀觀音。「大勢至菩薩」即第十一大勢至觀。「淨諸業障生諸佛前」：即第二、第三福業。

爾時世尊足步虛空，還耆闍崛山。爾時阿難廣爲大眾說如上事，無量諸天龍夜叉，聞佛所說皆大歡喜，禮佛而退。

本節文分二，佛步空還，阿難重述。

崛山沒王宮出，步空還崛山顯，二俱神通，佛實未動。王宮機悟，崛山未知故由阿難重述，等於佛說。「天」：包括三界二十八天。「龍」：梵語那伽，身長無足，八部之一，有神力變化雲雨。輔行四曰，龍得小水而降大雨。「夜叉」：即藥叉，譯曰，能噉鬼、捷疾鬼、勇健鬼、輕捷、秘密等，有在地、在虛空、在天夜叉。

中華民國六十九年八月二十八日講於台北靜明念佛會



日期：二〇二〇年九月五日

版本：2020.09.05

網址：<http://www.forlong.us>

